



Här Fernand Etgen
President vun der Chamber

Lëtzebuerg, den 9. Februar 2022

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Minister fir Educatioun, Kanner a Jugend an un den Här Minister fir Mobilitéit an ëffentlech Baute weiderzeleeden.

Zum Zäitpunkt vun der Planung vum Lycée technique agricole zu Gilsdref gouf vill iwwer d'Méiglechkeet vu Parkplazen diskutéiert. Als Kompromëss gouf um Enn deen aktuelle Parking zrëckbehal, mat 100 Plaze fir d'Enseignanten, dat technesch an dat administratiivt Personal, d'Visiteuren an d'Fournisseure vun der Schoul.

Ëmsou méi misst dowéinst d'Ubannung vun der Akerbauschoul un den ëffentlechen Transport nach eng Kéier op de Leescht geholl ginn. Grad well de Lycée technique agricole eng Schoul „à formation unique“ ass, misst deen eigentlech esou organiséiert sinn, dass d'Schüler – ganz egal, a wéi engem Deel vum Land se wunnen – mat engem akzeptablen Zäitopwand kéinten an den Unterrecht kommen.


Dat ass laut mengen Informatiounen awer net de Fall, an awer wëll d'Regierung keen adequate Parkraum fir d'Schüler vun der Akerbauschoul respektiv fir d'Leit, déi un de Weiterbildungscoursen deelhuele, virgesinn. Dat geet ganz kloer aus der Äntwert op d'Question parlementaire Nummer 5256 ervir.

An deem Kontext wéilt ech folgend Froen un den Här Minister fir Educatioun, Kanner a Jugend an un den Här Minister fir Mobilitéit an ëffentlech Baute stellen :

- Kënnen déi Häre Ministeren mir eng Iwwersiicht zoukomme loosse mat der Verdeelung vun der Wunnuerter vun de Schüler vun der Akerbauschoul, iwwer dat ganz Land gekuckt?
- Hunn déi Häre Ministeren analyséiere gelooss, wéi eng Méiglechkeeten d'Schüler reell hunn, fir aus hirer Uertschaft mam ëffentlechen Transport an d' Schoul ze kommen?
 - Wa jo, kënnen déi Häre Ministeren mir déi Etude zou komme loosse?
 - Wann net, firwat gouf de Schoulwee vun de Schüler net am Detail gekuckt?
- Sinn déi Häre Ministeren bereet, vun allen Optiméierungsméiglechkeeten ze profitéieren?
 - Wa jo, wéi eng Optiméierungsméiglechkeeten sinn identifizéiert ginn?
- D'Akerbauschoul bitt ë.a. am Kader vum Agrargesetz eng Partie Weiderbildungen un. Wéi eng Méiglechkeete wëllen déi Häre Ministeren de Leit ginn, déi un dese Couren deelhuele, fir hiren Auto kënnen ze parken?

- An hirer Äntwert op d'Question parlementaire Nummer 4848 hunn déi Häre Ministeren ë.a. Folgendes geäntwert: „*Déi Lycéeën, déi eng spezial Formatioun ubidden, verfüge quasi alleguer iwwer een Internat. Dëst soll et de Schüler erlaben, direkt niewent hirer Schoul ze wunnen an d'Transportweeër op ee Minimum ze reduzéieren.*“ D'Regierung huet allerdings decidéiert, deem um Site Gilsdref geplangten Internat net ze bauen.
 - Wann een elo déi aktuell Situatioun kuckt, halen déi Häre Ministeren et net awer fir sënnvoll, een Internat um Site ze hunn?
 - Kënnen déi Häre Ministeren mech an deem Kontext iwwer de Fortgang vun de Planungen informéieren, wat de bestoenden „Internat Jacques Brocquart“ zu Dikrech ugeet, dee laut der Äntwert op d'Question parlementaire Nummer 4848 an Zukunft virun allem de Schüler aus der Akerbauschoul soll zur Verfügung stoen?

Här President, ech bieden Iech, mäin déifste Respekt unzehuelen.



Martine Hansen

Co-Fraktiounspresidentin



Gemeinsam Äntwert vum Minister fir Educatioun, Kanner a Jugend, Claude Meisch, a vum Minister fir Mobilitéit an ëffentlech Aarbechten, François Bausch, op d'parlamentaresch Fro Nr. 5724 vun der honorabeler Deputéiert Martine Hansen

Ad 1)

D'Schülerinnen an d'Schüler, déi am Schouljoer 2021-2022 an der Ackerbauschoul ageschriwwe sinn, kommen aus follgende Gemengen (respektiv aus den Nopeschlänner):

Beaufort	7
Beckerich	7
Berdorf	3
Bertrange	2
Bettembourg	6
Bettendorf	14
Betzdorf	4
Bissen	7
Biwer	2
Boulaide	5
Bourscheid	7
Bous	1
Clervaux	10
Colmar-Berg	6
Consdorf	5
Contern	2
Diekirch	10
Differdange	6

Dippach	5
Dudelange	5
Echternach	9
Ell	7
Erpeldange-sur-Sûre	9
Esch-sur-Alzette	12
Esch-sur-Sûre	13
Ettelbruck	4
Feulen	8
Fischbach	6
Flaxweiler	3
Frisange	3
Garnich	5
Goesdorf	8
Grevenmacher	2
Grosbous	4
Habscht	4
Heffingen	3
Helperknapp	6
Hesperange	1
Junglinster	10
Käerjeng	10
Kayl	5
Kehlen	7
Kiischpelt	4
Koerich	6
Kopstal	3

Lac de la Haute-Sûre	11
Larochette	3
Lenningen	4
Leudelange	1
Lintgen	3
Lorentzweiler	1
Luxembourg	17
Mamer	4
Manternach	4
Mersch	20
Mertert	3
Mertzig	8
Mondercange	4
Mondorf-les-Bains	3
Niederanven	3
Nommern	8
Parc Hosingen	18
Pétange	10
Préizerdaul	6
Putscheid	9
Rambrouch	13
Redange-sur-Attert	7
Reisdorf	6
Remich	1
Roeser	3
Rosport-Mompach	5
Rumelange	4

Saeul	3
Sandweiler	1
Sanem	14
Schengen	3
Schieren	5
Schifflange	3
Schuttrange	1
Stadtbredimus	4
Steinfort	3
Steinsel	3
Strassen	1
Tandel	10
Troisvierges	3
Useldange	8
Vallée de l'Ernz	8
Vianden	5
Vichten	4
Wahl	2
Waldbillig	11
Waldbredimus	1
Walferdange	3
Weiler-la-Tour	4
Weiswampach	2
Wiltz	13
Wincrange	15
Winseler	2
Wormeldange	1

<i>Allemagne</i>	17
<i>Belgique</i>	1
<i>France</i>	3
Total	599

Ad 2) an 3)

Virun all Schoulreentrée gëtt opgrond vun den Aschreiwungen am Detail gekuckt, wéi eng Méiglechkeeten d'Schülerinnen an d'Schüler hunn, fir aus hirer Uertschaft mam ëffentlechen Transport an d'Schoul ze kommen. Dëst geschitt an enker Zesummenaarbecht tëscht de Servicer vum Ministère fir Educatioun, Kanner a Jugend (MENJE), deene vum Ministère fir Mobilitéit an ëffentlechen Aarbechten (MMTP) an den eenzelne Lycéeën. Jee nodeem wéi d'Situatioun sech presentéiert, ginn Upassunge vun den Horairë vum ëffentlechen Transport realiséiert.

Esou ass och am Fall vun der Ackerbauschoul (LTA) verfuer ginn. Dofir huet keng spezifesch Etude misse gemaach ginn, mee wéinst der geographescher Proximitéit ass den Horaire vum LTA un dee vum Lycée classique vun Dikrech (LCD) ugepasst ginn. Op déi Manéier ka vun der besteeënder regionaler Transportoffer profitéiert ginn, ouni zousätzlechen Trafic fir d'Nordstad ze generéieren.

Donieft ass fir d'Schülerinnen an d'Schüler aus de Gemenge Miersch, Noumer an zum Deel Aerenzdall eng nei Linn op Gilsdref/Dikrech agefouert ginn (Linn 549), an am November 2021 ass d'Navett vum LTA op Miersch (Linn 548) verstärkt ginn. Vun Norde ginn et méttlerweil Direktbusser iwwert d'N7 (Linnen 553 an 554) op Dikrech/Gilsdref.

Bei ronn 600 Schülerinnen a Schüler aus dem ganze Land wier et net méiglech gewiescht, e separate Réseau mat Direktbusser opzebauen.

Ad 4)

D'Parkingsituatioun vum LTA ass momentan effektiv net ganz einfach; dëst huet mat enger Rei vu Problemer ze dinn, déi awer am Laf vun der nächster Zäit wäerte kënnen geléist ginn. D'Barrières d'accès kënnen an Zukunft vum Lycée programmiert ginn. D'Programmation erméiglecht et, den Zougang ze limitéiere fir d'Enseignanten, déi ee Badge hunn, oder fir Visiteuren, respektiv Leit déi während de Schoulzäiten u Weiderbildungen an der Ackerbauschoul deelhuefen, déi sech iwwert de Parlophone kënnen umellen. Eng weider Méiglechkeet besteet doran, d'Barrière vum Parking esou ze programméieren, datt se zu bestëmmten Auerzäite opstoe bleiwen, wéi zum Beispill owes während der Zäit, wou déi meeschte Weiderbildungen an der Ackerbauschoul ugebuede ginn.

Ausserdeem ass de Chantier nach net ganz ofgeschloss, wat bedeit, datt am Moment nach eng ganz Partie Gefierer vu Firmen um Site stinn. Och eng Rei Baucontainer stinn nach um Site; wann déi bis fort sinn an de Belag definitiv gemaach ass, kéinten eng weider 10 bis 20 Parkplazen agezeechent ginn.

Ad 5)

Zu Dikrech gëtt et d'Internat "Jos Schmit", dat vun der Jacques Brocquart asbl geréiert gëtt an dat zum Deel vu Schülerinnen a Schüler aus der École d'Hôtellerie et de Tourisme du Luxembourg (EHTL) genotzt gëtt. D'EHTL kritt awer en eegent Internat fir hir Schülerinnen a Schüler, domat gi bis zu 50 Plaze fräi an dësem Internat zu Dikrech, déi dee Moment vun de Schülerinnen a Schüler aus dem LTA

kënne besicht ginn. Des Weideren hu mir nach d'Internat "Sainte Anne" zu Ettelbréck mat 120 Plazen, wat och vun der Jacques Brocquart asbl bedriwwe gëtt. Dat ass aktuell zu 70 % besat, sou datt et eng zousätzlech Capacitéit fir Jonker aus der Ackerbauschoul an der Regioun gëtt. An deenen zwou Strukture kënnen och haut scho Schülerinnen a Schüler aus dem LTA opgeholl ginn.

Aus deene Grënn ass et am Moment net virgesinn, nach e weidert Internat um Site vum LTA ze bauen.

Lëtzebuerg, den 22. Mäerz 2022

De Minister fir Educatioun,
Kanner a Jugend

(s.) Claude MEISCH